

Ár 2017, fimmtudaginn 22. júní, var fundur í kjararáði að Hverfisgötu 6a í Reykjavík haldinn af Jónasi Þór Guðmundssyni, Berglind Svavarsdóttur, Huldu Árnadóttur, Óskari Bergssyni og Svanhildi Kaaber.

Fyrir var tekið:

Að ákveða laun og starfskjör varaforseta Hæstaréttar Íslands

I.

Samkvæmt 3. gr. laga um kjararáð nr. 47/2006 með síðari breytingum ákveður fullskipað kjararáð laun hæstaréttardómara og héraðsdómara.

II.

Fyrir kjararáði liggur beiðni varaforseta Hæstaréttar Íslands um að honum verði raðað sérstaklega í launaflokk. Í bréfi hans til kjararáðs dagsettu 1. desember 2016 segir að í 1. mgr. 5. gr. laga nr. 15/1998 um dómstóla sé kveðið á um að kjósa skuli varaforseta Hæstaréttar til sama tíma og forseta hans. Það sé því ekki valkvætt að kjósa varaforseta heldur sé um lögbundna ráðstöfun að ræða. Um skyldur varaforseta segi í lögnum að hann gegni störfum forseta þegar hann hafi forföll eða sé fjarstaddur. Í þessu felist að varaforseti sé staðgengill forseta réttarins. Þá segir í bréfinu að samkvæmt 2. mgr. 10. gr. stýri forseti dómi eigi hann þar sæti, en ella varaforseti. Þannig stýri varaforseti í fjarveru forseta þinghöldum og eftirfarandi dómarafundum samkvæmt 2. mgr. 165. gr. laga nr. 91/1991 um meðferð einkamála og 2. mgr. 209. gr. laga nr. 88/2008 um meðferð sakamála. Jafnframt kemur fram í bréfinu að varaforseti réttarins hafi ásamt forseta sinnt faglegum tengslum og samráði við æðstu dómstóla á hinum Norðurlöndunum. Loks hafi varaforseti sinnt ýmsum skyldum er lúti að innri stjórn réttarins. Undanfarin ár hafi hann sem dæmi setið í þremur nefndum sem starfi innan réttarins og séu hluti af stjórnkerfi hans. Í fyrsta lagi nefnd um tilnefningar og skipanir í nefndir og ráð sem réttinum ber að lögum að sinna. Í öðru lagi nefnd um ákvörðun um fjölda dómenda í einstökum málum og tíma sem lögmenn fá til flutnings máls fyrir réttinum, sbr. 2. mgr. 160. gr. og 5. mgr. 161. gr. laga nr. 91/1991 og sambærileg ákvæði í lögum nr. 88/2008. Í þriðja lagi stýri varaforseti bókasafnsnefnd réttarins. Þar sem forseti Hæstaréttar hafi ekki setið í framangreindum nefndum hafi það komið í hlut varaforseta að leiða starf þeirra að því leyti sem þörf hafi verið á. Einnig hafi varaforseti verið í hópi þriggja dómenda sem Hæstiréttur hafi skipað til þess að endurskoða reglur um málsgögn. Framangreindum starfsskyldum sinni varaforseti, eins og forseti þegar við á, til viðbótar hefðbundnum dómarastörfum til jafns við aðra dómara við réttinn. Í ljósi framangreindrar lýsingar á stöðu varaforseta Hæstaréttar að lögum og starfsskyldum er áréttuð ósk um að varaforseta réttarins verði skipað í sérstakan launaflokk. Þessu til stuðnings er vísað til upphafsákvæðis 1. mgr. 8. gr. laga nr. 47/2006 um kjararáð þar sem mælt er fyrir um að ráðið skuli gæta innbyrðis samræmis í starfskjörum þeim sem það ákveður. Einnig er vísað til ákvarðana kjararáðs um launakjör vararíkissaksóknara, varahéraðssaksóknara og vara-dómstjórans í Reykjavík.

Með bréfum dagsettum 13. desember 2016 var fjármála- og efnahagsráðuneyti og innanríkisráðuneyti gefinn kostur á að leggja fram greinargerðir vegna erindisins, sbr. 6. gr. laga um kjararáð. Þá var forseta Hæstaréttar með bréfi dagsettu sama dag gefinn kostur á að koma sjónarmiðum réttarins á framfæri.

Fjármála- og efnahagsráðuneytið sendi kjararáði bréf dagsett 7. febrúar 2017. Í bréfinu segir að ráðuneytið telji eðlilegt að hafa hliðsjón af fyrri ákvörðun kjararáðs varðandi staðgengla. Að mati ráðuneytisins sé rétt að líta til þeirra sjónarmiða sem varaforseti Hæstaréttar reifi í erindi sínu, miðað við þær forsendur sem þar séu raktar.

Innanríkisráðuneytið sendi kjararáði bréf dagsett 3. janúar 2017. Í bréfinu segir að ráðuneytið telji rétt að kjararáð taki til skoðunar beiðni varaforseta Hæstaréttar og horfi í því

tilliti meðal annars til þess sem komi fram í bréfi hans þar sem hann vísar til ákvörðunar kjararáðs er komi að því að setja varadómstjóra, varahéraðssaksóknara og vararíkissaksóknara í sérstakan launaflokk.

Forseti Hæstaréttar sendi kjararáði bréf dagsett 20. desember 2016. Í bréfinu er tekið undir beiðni varaforseta réttarins.

Með bréfi dagsettu 15. febrúar 2017 fékk varaforseti Hæstaréttar send framangreind bréf til kynningar og honum gefinn kostur á að koma á framfæri athugasemdum við efni þeirra. Í bréfi hans dagsettu 20. febrúar 2017 eru ekki gerðar athugasemdir við nefnd bréf.

III.

Í 8. gr. laga um kjararáð segir, að það skuli við úrlausn mála gæta innbyrðis samræmis í starfskjörum þeim sem það ákveður, og að þau séu á hverjum tíma í samræmi við laun í þjóðfélaginu hjá þeim sem sambærilegir geta talist með tilliti til starfa og ábyrgðar. Við ákvörðun sína skuli kjararáð gæta þess að föst laun fyrir dagvinnu, annarra en forseta Íslands, verði ekki hærrí en föst laun forsætisráðherra samkvæmt 3. gr. Við ákvörðun launakjara samkvæmt 4. gr. laganna skuli sérstaklega gæta samræmis milli þeirra og þeirra kjara hjá ríkinu sem greidd eru á grundvelli kjarasamninga annars vegar og ákvarðana kjararáðs samkvæmt 3. gr. hins vegar. Þá skuli kjararáð ætíð taka tillit til almennrar þróunar kjaramála á vinnumarkaði. Í 10. gr. laganna segir að ráðið skuli taka mál til meðferðar þegar því þyki þurfa og ætíð ef orðið hafa verulegar breytingar á þeim launum í þjóðfélaginu sem höfð skulu til viðmiðunar samkvæmt lögnum eða á störfum þeirra sem úrskurðarvald þess tekur til.

Kjararáð ákvað dómurum laun 17. desember 2015. Er í úrskurðinum gerð grein fyrir helstu ákvæðum stjórnarskrár og almennra laga sem gilda um dómstóla. Hæstaréttardómarar kjósa sér forseta til fimm ára í senn og varaforseta til sama tíma. Varaforseti gegnir störfum forseta þegar hann hefur forföll eða er fjarstaddur. Með vísan til framangreinds sem og þess innbyrðis samræmis sem kjararáði ber að gæta og áður er gerð grein fyrir hefur kjararáð ákveðið að laun og önnur starfskjör varaforseta Hæstaréttar skuli vera svo sem segir í ákvörðunarorði.

IV.

Ákvörðunarorð

Frá og með 1. janúar 2016 skulu mánaðarlaun varaforseta Hæstaréttar Íslands vera samkvæmt launaflokki 502-148, nú 1.432.454 krónur. Að auki skal greiða honum 48 einingar á mánuði fyrir alla yfirvinnu er starfinu fylgir.

Laun eru við það miðuð að um fullt starf sé að ræða og þannig ákveðin að ekki komi til frekari greiðslna nema kjararáð úrskurði um það sérstaklega.

Að öðru leyti skal ákvörðun kjararáðs nr. 2015.3.001 um laun og starfskjör dómara óbreytt standa.

Jónas Þór Guðmundsson

Berglind Svavarsdóttir

Hulda Árnadóttir

Óskar Bergsson

Svanhildur Kaaber